

TUTÚ NÍ CADÚHA TĒ PĀBLŪ QUIHIⁿ NDAHA ÑÁYIU ÑUÚ ÉFESÚ

Té Pāblú cādūha-dé tutú quihiⁿ ndaha ñáyiú xĩndecu ichi Xítoho Jesucristú ndécú ñuú Éfesú

¹ Yúhú té Pāblú ní tendaha ñaha Yá Ndiõxí cāháⁿ-í tnúhu Xítoho Jesucristú núú ñáyiú, chí ducaⁿ ní cachí Yá Ndiõxí cunduu, te vitna cādúha-í tutú-a cuendá daquixi-í ndaha nchaa nchòhó ñáyiú cùu cuendá Yá Ndiõxí xĩndecu ñuú Éfesú, te diu-ni nchòhó cúú-ndó ñáyiú sàndáá iní ñáhá xì Xítoho Jesucristú.

² Te xicáⁿ táhù-í núú Dütú Ndiõxí Yaá cúú Tātá-ó, ndihi núú Xítoho Jesucristú sá ná chĩndee chítúu ñaha-gã xii-ndo, te ducaⁿ ndì nduú-gá ná cādá te ío váha cuu iní-ndó cùndecu-ndo.

Espíritú Yá Ndiõxí chĩndè ñaha-xi xii-o chi ndècu ndihi-o Xítoho Jesucristú

³ Te cachí-ó sã ïo cāhnu cuu Yá Ndiõxí Yaá cúú Tātá Xítoho Jesucristú, te ndéé andiú quide Yá Ndiõxí nchaa sá vāha sá cúú-xí-ó cuendá sá ndécú ndihi-o Espíritú-gá, te ducaⁿ quide-gá chí ndècu ndihi-o Xítoho Jesucristú. ⁴ Te ndéé cútñahá vátá ngáva-gá ñuyiú ñí cachí Yá Ndiõxí sá nchóo cùu-o ñáyiú cùu cuendá-gá, te ducaⁿ ñí cachí-gá sá cuendá Xítoho Jesucristú cuendá sá nchóo cùu-o ñáyiú ñá túú tnàhí ná cumání cundecu núú-gã, te ducaⁿ te vá cùndècu cuéchi-o. ⁵ Te Yá Ndiõxí ío

cùu iní ñáhá-gă xii-o nũu xiăⁿ ducaⁿ ñĩ cachí-gá ndéé cútnàhá vátá ngăva-gá ñuyíú sã nchóó ndùu-o déhe-gá. Te sá cuendá nchaa sá cádá Xítohó Jesucristú sá cúú-xí-ó, xiăⁿ ducaⁿ ñĩ cachí Yă Ndiöxí, te ducaⁿ ñĩ cachí-gá chi ducaⁿ tnàhí ní sani iní-gá cunduu. ⁶Te xiăⁿ nũu xini ñuhu-xi sá nchóó càchí-ó sã ìo càhnu cuu Yă Ndiöxí, chi ìo cundahú iní ñáhá-gă chindèe ñaha-gá xii-o. Te ducaⁿ quide-gá chi ndècu ndihí-o Xítohó Jesucristú Yaá ìo cùu iní-gá. ⁷Te Yă Ndiöxí ìo cùu iní ñáhá-gă xii-o nũu xiăⁿ Xítohó Jesucristú ní sati ñĩñí-gă te ní xihí-gá cuendá dacăcu nihnu ñaha-gă xii-o nũú ùhú núú ndàhú, te ducaⁿ càda cahnu iní-gá nchaa yíca cuěchi-o. ⁸Te Yă Ndiöxí ìo cundahú iní ñáhá-gă chindèe ñaha-gá xii-o, năcuáa ngúndecu ndihí-o nchàa sá xini tnùní-ó te ducaⁿ te cuu-o ñăyiu təcú tnùní. ⁹Te Yă Ndiöxí ní dánèhé ñáhá-gă xii-o nchàa sá ndúú yùhu, nchaa sá ñĩ sani iní-gá cada-gá. Te ducaⁿ ñĩ quide-gá chi ducaⁿ ñĩ sani iní-gá cunduu. ¹⁰Te sá ñĩ sani iní-gá cada-gá te dacuitíí sã cádá-gă ná sàá nduu, te na sàá nduu-áⁿ te mee-gă cada sá Xítohó Jesucristú quindaha-gă nchaa sá ìo andiu, ndihí nchaa sá ìo ñuyíú-a.

¹¹Te nchoo ñĩ nduu táhú-ó ñĩ nduu-o ñăyiu cùu cuendá Yă Ndiöxí chi ndècu ndihí-o Xítohó Jesucristú. Te ducaⁿ ñĩ cuu chi ducaⁿ tnàhí ní sani iní Yă Ndiöxí cunduu. Te nchaandi túhú sá quidé-gă, quide-gá năcuáa sàni iní mée-gă cunduu. ¹²Te ducaⁿ ñĩ cuu cuendá sá nchũhú ñăyiu díhna nuu ñĩ sándáá iní tnúhu Xítohó Jesucristú cáháⁿ-ndí sá ìo càhnu cuu mee Yă Ndiöxí cuendá nchaa sá vaha quide-gá. ¹³Te nchòhó tucu cútnàhá ní xíndedóho-ndo tnũhu ndáá tnúhu sá càháⁿ năcuáa

naníhí tǎhú-ó ní cuu ñⁿnuu-ndo ndìhi Xítóhó Jesucristú chi ní sǎndáá iní-ndó-gǎ. Te xǎⁿ cútnùní sǎ nchòhó ní nduu-ndo ñǎyiu cùu cuendá Yǎ Ndiǒxí, chi ní ngúndecu ndìhi-ndo Espíritú-gǎ sǎ ní cachí-gǎ taxi-gǎ. ¹⁴ Te sǎ ndécú ndìhi-o Espíritú Yǎ Ndiǒxí xǎⁿ cútnùní sǎ ndáá nduu tǎhú-ó cùndecu-o ndìhi-gǎ ná sàá nduu nàcuaca ñàha-gǎ xii nchaa nchoo ñǎyiu cùu cuendá-gǎ, te sǎ dúcáⁿ càda-gǎ nùu xǎⁿ tǎu-ó càchí-ó sǎ ïo càhnu cuu-gǎ.

Té Pǎblú xìcáⁿ tǎhú-dě núú Yǎ Ndiǒxí cuendá cue ñǎyiu ndècu ichi-gǎ

¹⁵ Te yúhú ñìhí-í tnúhu sǎ nchòhó ïo váha sǎndáá iní-ndó Xítóhó Jesucristú, te nchaa ñǎyiu cùu cuendá Yǎ Ndiǒxí ïo cùu iní-ndó-yu. ¹⁶ Te xǎⁿ nùu ñá túú dàña ndeé-í ndàcáⁿ tǎhù-í núú-gǎ cuendá-ndó, te ïo xìcáⁿ tǎhù-í ¹⁷ núú Yǎ Ndiǒxí Yaá cúú Tǎtá Xítóhó Jesucristú cuendá-ndó. Te diu-ni Yǎ Ndiǒxí cúú-gǎ Yaá ïo càhnu cuu. Te xìcáⁿ tǎhù-í núú Yǎ Ndiǒxí sǎ méé-gǎ ná cádá sǎ Espíritú-gǎ chindee ñàha-xi xii-ndo cuendá cuu-ndo ñǎyiu tècú tnùní, te na càda-xi sǎ cútnùní iní-ndó nàcuáa sàni iní Yǎ Ndiǒxí. ¹⁸ Te ducaⁿ xìcáⁿ tǎhù-í núú Yǎ Ndiǒxí cuendá-ndó, cuendá sǎ nchòhó tecú tnùní-ndó nàcuáa ndùu tnúhu ndee ìní ní taxi-gǎ ní ngúndecu ndìhi-ndo cǔtnàhá ní cáháⁿ ñáhá-gǎ xii-ndo. Te ducaⁿ cùtnuní tucu iní-ndó sǎ ncháá sǎ ní cachí-gǎ taxi-gǎ nduu tǎhú nchoo cuè ñǎyiu cùu cuendá-gǎ cúú-xí mèe cuií-ni sǎ ïo-gǎ váha. ¹⁹ Te cùtnuní tucu iní-ndó sǎ Yǎ Ndiǒxí ïo càhnu cuu-gǎ quidé-gǎ nchaa núú sǎ vǎha sǎ cúú-xí nchòo ñǎyiu sǎndáá iní ñáhá xii-gǎ, chi quide-gǎ sǎ vǎ yòo tnàhí ndàcu cada sǎ cúú-xí-ó dàtná ní quide-gǎ ²⁰ ní dándótó-gǎ Xítóhó Jesucristú cùtnàhá ní xíhí-gǎ. Te

ní taxinucóo-gá Xítóhó Jesucrístú xio cùha-gá táxí tnùní-gá. ²¹ Te Xítóhó Jesucrístú ío-gá cúnúu-gá dàcúúxí nchàa núú cuè espíritú, ndihi dàcúúxí nchàa cue téé yìndaha ñáyiú, ndihi dàcúúxí nchàa dava-gá cue téé cúnúu. Te cuèi vitna te cuèi ndéé núú cuàháⁿ núú vèxi ducaⁿ-ni ìo cunuu-gã taxi tnùní-gá. ²² Te mee Yã Ndiõxí ní quide-gá sá Xítóhó Jesucrístú taxi tnùní-gá nchaandi túhú sá íó, te ñiú-ni mee Yã Ndiõxí ní cachí-gá sá ncháá ñáyiú cùu cuendá-gá quindaha ñàha Xítóhó Jesucrístú. ²³ Te cada iní-ó sã ncháá ñáyiú cùu cuendá Yã Ndiõxí cúŷ-yu yiqui cùñú Xítóhó Jesucrístú, chi ñⁿ-ni cùú-yu ndihi-gá, te mee-gã táxí tnùní-gá nchaandi túhú sá íó.

2

Yá Ndiõxí ío cùndahú iní ñáhá-gã xii-o núu xíáⁿ ní dácãcu nihnu ñaha-gã

¹ Te nchòhó cúú-ndó dàtná ñáyiú ní xíhí cuendá nchaa sá cuèhé sá dúhá quide-ndo ni cuu, dico vitna cada iní-ndó sã dàtná ní ndoto-ndo chi ní nduu táhú-ndó cùndecu-ndo ndihi Yã Ndiõxí ní caa ni quíhíⁿ. ² Te ducaⁿ ñí xíndecu-ndo ìchi cuehé ichi duha, chi ní cáncicúⁿ nihnu-ndo nchàa sá cuèhé sá dúhá íó ñuyíú-a, te ní xóo cada-ndo nchàa nacuáa càháⁿ sácúíhná, te ñiú-ni sácúíhná-ãⁿ táxí tnùní-xi nchaa dava-gá espíritú cùndíhi-xi, te ñiú-ni-xi ndècu ndihi-xi nchaa ñáyiú ñá túú cùní tñi tñúhu càháⁿ Yã Ndiõxí, te dàcaháⁿ ñáhá-xí xii-yu cuendá cundecu-ní-yu ichi cuèhé ichi duha. ³ Te nchaa-o dùcaⁿ ní xóo cada-o dàtná quidé cuè ñáyiú-áⁿ, chi ní xóo cada-o nchàa sá cuèhé sá dúhá ñí xóo cani iní-ó, te nándi-gá nchaa sá cuèhé sá

dúhá nǐ xóo cahu iní-ó nǐ xóo cada-o, núu xǎⁿ tàú-ó sǎ dándòho ñaha Yá Ndiǒxí xii-o ni cùu datná tàú-xi dandòho-gá nchaa ñáyiú ducaⁿ ndècu ichi cuehé ichi duha-áⁿ. ⁴ Te Yá Ndiǒxí ío cùu iní ñáhá-gǎ xii-o núu xǎⁿ ní cundàhú iní ñáhá-gǎ xii-o ⁵ cuèi cùu-o datná ñáyiú ní xíhí sá cuendá nchaa sá cuèhé sá dúhá quìde-o ni cuu. Te ducaⁿ nǐ quide-gá ní cundàhú iní ñáhá-gǎ xii-o cuendá cundecu-o ndìhì Xítóhó Jesucristú vitna, te cuu ìⁿnuu-o ndìhì-gá. Te sá cuendá-ni sá cundàhú iní ñáhá Yá Ndiǒxí xii-o xǎⁿ ní quide-gá nàcuáa nchoo nàníhí tàhú-ó. ⁶ Te cada iní-ó sǎ dàtná ní quide Yá Ndiǒxí cùtnàhá ní dándótó-gǎ Xítóhó Jesucristú cùtnàhá ní xíhí-gá ducaⁿ nǐ quide ñaha-gǎ xii-o chi ndècu-o ndìhì-gá vitna. Te Xítóhó Jesucristú sa ndècu-gá andiú núú ndécú Yá Ndiǒxí. Te cada iní-ó sǎ Yá Ndiǒxí sa ní quide-gá sá nchóó nǐ ngúndecu túu-o ndìhì Xítóhó Jesucristú, chi ío váha ndècu-o vitna. ⁷ Te Yá Ndiǒxí quidé vǎha ñaha-gǎ xii-o vitna cuendá sá ná sàà nduu, te diú-ni mee-gǎ cada te cutnùnì iní nchaa ñáyiú sá ìo cùu iní ñáhá-gǎ xii-o, te ducaⁿ ìo chìndee chitúu ñaha-gǎ xii-o cuendá sá ndécú ndìhì-o Xítóhó Jesucristú. ⁸ Te Yá Ndiǒxí ío cundahú iní ñáhá-gǎ xii-ndo núu xǎⁿ ní quide-gá sá nchòhó naníhí tàhú-ndó. Te ducaⁿ nǐ quide-gá chi ní sándáá iní-ndó-gǎ. Te ñá díú sǎ cuendá ìⁿ chiuⁿ ni quide-ndo ducaⁿ ní nàníhí tàhú-ndó, chi mee Yá Ndiǒxí ní cuiní-gá sá dícó-ni ducaⁿ nàníhí tàhú-ndó. ⁹ Te mee Yá Ndiǒxí ní cachí-gá sá ñà díú cuendá ìⁿ chiuⁿ quide-o naníhí tàhú-ó, te ducaⁿ nǐ cachí-gá cuendá sá vǎ cádá càhnu-o mee-o. ¹⁰ Te Yá Ndiǒxí ní quide ñaha-gǎ xii-o dàtná ìⁿ ñáyiú saa

cuèndá sá ñí tnahá tnúhu-o ndìhì Xítóhó Jesucrìstú, te ducaⁿ ñí quide-gá cuèndá sá cádá-ó mèe-ni sá vǎha. Te Yá Ndiǒxí ducaⁿ tnahí ní sani iní-gá cunduu sá nchóó cùu-o ñáyiu cada mee-ni sǎ vǎha.

Xítóhó Jesucrìstú quidé-gǎ ío váha cùu iní-ó ndècu-o

¹¹ Te nchòhó chí dándàcu iní nàcuáa ní xíndecu-ndo ni cùu, chí ñá túú cùu-ndo ñáyiu isràél, te ni ñà túú quide-ndo datná quidé ñáyiu-áⁿ, chí ñáyiu-áⁿ sǎha-yu señá ñí-yu, te dàquee tíhǔ-yu nchaa ñáyiu ñá túú ndècu señá ñí-xi. ¹² Te chí dándàcu iní nàcuáa ní xíndecu-ndo, chí dàvá-áⁿ ñà túú ní xíndecu-ndo ndìhì Xítóhó Jesucrìstú, te ni ñà túú ní xǒo cuu tnahá tnúhu-ndo ndìhì ñáyiu isràél, te ni ñà túú ní xíní tñùní-ndó nàcuáa ndùu tnúhu sá ñí cáháⁿ ndáá Yá Ndiǒxí nàcuáa cada váha-gá ñáyiu, te ni ñà túú ní cùu-ndo ñáyiu quíndaha-gǎ, te ni ñà túú ní xǒo níhí-ndó tñùhu ndee ìní sá cùndècu-ndo ndìhì-gá. ¹³ Te cuèi ní cuu-ndo ñáyiu ñá túú tnahá tnúhu ndìhì Yá Ndiǒxí ní cùu, dico vitna ní tnahá tnúhu-ndo ndìhì-gá chí cùu ìⁿnuu-ndo ndìhì Xítóhó Jesucrìstú, cuèndá sá ñí sati níñí-gǎ te ní xíhí-gá te xǎⁿ ducaⁿ tnahá tnúhu-ndo ndìhì Yá Ndiǒxí vitna. ¹⁴ Te Xítóhó Jesucrìstú ní quide-gá sá nchóó ío váha cuu iní-ó cùndecu-o, te ñu-ni-gá ní quide cuèndá sá vǎ dáquèe tíhú ñáhá ñáyiu isràél xii ñáyiu ñá túú cùu ñáyiu isràél, te ducaⁿ ìⁿ-ná cuú-yu cundecú-yu. ¹⁵ Te sá ñí xíhí Xítóhó Jesucrìstú, xǎⁿ ñá túú-gǎ cùnùu nchaa tnúhu sá sánú ìchi ñaha xii ñáyiu nàcuáa cadá-yu cundecú-yu ni cùu. Te ducaⁿ ñí xíhí Xítóhó Jesucrìstú cuèndá sá cuè ñáyiu isràél ndìhì cue ñáyiu ñá túú cùu ñáyiu isràél

ɛ̃ⁿ-nǎ cuú-yu cundecú-yu ichi-gá, te ducaⁿ te vá dáquèe tihú tnáhá-gǎ-yu, te ío váha cundecu ndihì tnáhá-yu. ¹⁶ Te ducaⁿ nǐ quide Xítohó Jesucristú ní xihí-gá núú cùrúxí cuendá sá cue ñáyiú cùu ñáyiú isràél ndihì cue ñáyiú ñá túú cùu ñáyiú isràél vá dáquèe tihú tnáhá-gǎ-yu. Te ducaⁿ nǐ xihí-gá cuendá ɛ̃ⁿ-nǎ cuú-yu tnahá tnúhu-yu ndihì Yá Ndiõxí nàcuáa cuu váha iní ñáhá-gǎ xií-yu.

¹⁷ Te cuèi cùu-ndo ñáyiú ñá túú tnàhí xìní ndáá cuendá Yá Ndiõxí ní cùu, dico Xítohó Jesucristú ní quixi-gá ñuyíú-a ní cáháⁿ-gá tnúhu váha nàcuáa ío váha cuu iní-ndó cùndecu-ndo ndihì Yá Ndiõxí. Te ñu-ni ducaⁿ nǐ quide-gá sá cúú-xí ncháa ñáyiú sa xìní cuendá Yá Ndiõxí, ñu-ni ñáyiú isràél. ¹⁸ Te cuèi cùu-o ñáyiú isràél àdi ñá túú cùu-o dico ñu-ni mee Xítohó Jesucristú ní quide-gá sá ncháá-ó tnáhá tnúhu-o ndihì Dútú Ndiõxí Yaá cúú Tǎtá-ó. Te ducaⁿ nǐ tnahá tnúhu-o ndihì Yá Ndiõxí chi ní ngúndecu ndihì-o Espíritú-gá. ¹⁹ Te nchòhó ñáyiú ñá túú cùu ñáyiú isràél ní cuu-ndo ñáyiú ñá túú tnáhá tnúhu ndihì Yá Ndiõxí ní cùu, dico vitna chi ɛ̃ⁿ-nǎ ní cuu-ndo ndihì nchaa dava-gá ñáyiú cùu cuendá-gá chi cùu-ndo déhe-gá. ²⁰ Te cada iní-ó sǎ cue téé ní táuchíúⁿ Xítohó Jesucristú cáháⁿ tnúhu-gá, ndihì cue téé ní xóo cáháⁿ tnúhu Yá Ndiõxí ndéé sanaha cùu-güedé òtná cimièntú ɛ̃ⁿ vehe, te nchòhó cúú-ndó òtná ndóho sá sàá vehe-áⁿ, te cada tucu iní-ó sǎ Xítohó Jesucristú cúú-gǎ ɛ̃ⁿ yúú cúnùu cuu cimièntú vehe-áⁿ. ²¹ Te ducaⁿ ño váha cùu ɛ̃ⁿnuu nchaa ndóho-áⁿ ndihì yúú cúnùu-áⁿ, te ducaⁿ tucu ío váha ta quèe tnàha nchaa ndóho-áⁿ cuásaá. Te xiǎⁿ cada iní-ó sǎ cúú-xí vehe Yá Ndiõxí, vehe sá ño ní cuu íí. Te ducaⁿ sǎtnáhá-xi

cùu nchaa ñáyiu ndècu ichi Xítóhó Jesucristú chi ní tnahá tnúhu-yu ndihí-gá, te ìíⁿ nduu ìíⁿ nduu ta cùu vii cuu váha-gá-yu núú Yă Ndiöxí cuáháⁿ.
 22 Te tnahá nchòhó ducaⁿ sãtnahá-xi cùu-ndo chi ní ngúndecu ndihí-ndo Xítóhó Jesucristú, te ducaⁿ ta cùu vii cuu váha tucu-ndo núú Yă Ndiöxí cuáháⁿ, te cùu-ndo datná vehe Yá Ndiöxí chi ndècu ndihí-ndo Espíritú-gá.

3

Té Păblú yíhí díquí-dě cáháⁿ-dé tnúhu Xítóhó Jesucristú núú ñáyiu ñá túú cùu ñáyiu isrâél

1 Te yúhú té Păblú yíhí-í vecaá sá cuendá sá cáháⁿ-í tnúhu Xítóhó Jesucristú núú nchòhó ñáyiu ñá túú cùu ñáyiu isrâél, núu xíăⁿ dîu cuendá-gá duha yíhí-í vecaá vitna. 2 Te nchòhó sa nàha-ndo sá Yă Ndiöxí ní cundàhú iní ñáhá-gă xii-í, te ní cachí-gá sá yúhú quihí díquí-í cáháⁿ-í tnúhu Xítóhó Jesucristú núú-ndó, te cuendá sá cáháⁿ-í tnúhu-gá núú-ndó te cuu-xi sá vâha sá cúú-xí-ndó. 3 Te yúhú sa ní cachí tnúhu-í xii-ndo lùha nacuáa ndùu tnúhu ndùu yuhu ní cuu, sá ní cachí tnúhu Yá Ndiöxí xii-í. 4 Te òré dàcuaha-ndo tnúhu ndùu yuhu-áⁿ ní cùu te quiní-ndó sã yúhú tècú tnùní-í nàcuáa ndùu tnúhu-áⁿ, te tnúhu-áⁿ cáháⁿ-xi cuendá Xítóhó Jesucristú. 5 Te tnúhu-áⁿ cúú-xí tnúhu sá vă yôo tnahí xini ní cùu, dico cue tée ní táuchíúⁿ Xítóhó Jesucristú cáháⁿ tnúhu-gá, ndihí cue tée cáháⁿ nàcuáa dàcahu iní ñáhá Yă Ndiöxí ní níhí-güedě tnúhu ndùu yuhu-áⁿ, chi Espíritú Yă Ndiöxí ní xáhaⁿ-xi xii-güedé. 6 Te duha cáháⁿ tnúhu ndùu yuhu-áⁿ ní cùu: “Cuëi ñáyiu ñá túú cùu ñáyiu isrâél te cuëi

ñáyiú cùu ñáyiú isràél dico ìⁿ-ni ndùu táhũ-yu sá vǎha núú Yǎ Ndiǒxí, te núu na quíndáá iní-yu tnúhu sá càháⁿ nàcuáa naníhí tàhú-yu, te ìⁿ-ná cúũ-yu cundecú-yu, te ducaⁿ ìⁿ-ni cada váha ñaha Yǎ Ndiǒxí xií-yu te núu na cùndecu ndìhí-yu Xítóhó Jesucrístú”, duha ndùu tnúhu ndùu yuhu-áⁿ ní cùu.

7 Te Yá Ndiǒxí ní cundàhú iní ñáhá-gǎ xii-í ní taxi-gá chiúⁿ quide-í càháⁿ-í tnúhu-gá, te mee-gǎ quidé-gǎ sá yǔhú ndacu-í càháⁿ-í tnúhu-gá. 8 Te nchaa ñáyiú cùu cuendá Yǎ Ndiǒxí cúũ-yu ñáyiú ío-gá cúnùu cadá-yu chiúⁿ-gá dàcúxí yǔhú, te cuèi ducaⁿ dico Yá Ndiǒxí ní cundàhú iní ñáhá-gǎ xii-í ní taxi-gá chiúⁿ quide-í càháⁿ-í tnúhu-gá núú cuè ñáyiú ñá túú cùu ñáyiú isràél. Te tnúhu-gá-áⁿ càháⁿ-xi sá sũní ïo váha cada ñaha Xítóhó Jesucrístú xii-o. 9 Te ducaⁿ ñí cachí Yǎ Ndiǒxí sá càháⁿ-í tnúhu-gá cuendá danèhé-í nchaa ñáyiú. Te sá dánèhé-í-yu-áⁿ cúú-xí tnũhu ndùu yuhu sá ñí sani iní-gá ndéé sanaha nàcuáa cada váha-gá cue ñáyiú. Te ndéé dàvá-áⁿ ñí quesaha ndùu yuhu tnúhu-áⁿ ní cùu. Te ðiu-ni-gá cúú-gǎ Yaá ní cadúha nchaandi túhú sá ïó. 10 Te ducaⁿ ndùu yuhu tnúhu-áⁿ ní cùu cuendá sá ncháá espíritú cúnùu ndecu andiú quini-xi vitna nàcuáa quide nchaa ñáyiú ní tuha ñaha xii Yá Ndiǒxí cuendá ducaⁿ cùtnuní iní-xi sá ïo váha cùtnuní iní-gá nàcuáa cada-gá. 11 Te Yá Ndiǒxí ní sani iní-gá ndéé sanaha nàcuáa ní cuini-gá cada Xítóhó Jesucrístú, te ní sáá nduu ñí quide Xítóhó Jesucrístú nàcuáa ní cuini Yǎ Ndiǒxí cada-gá. 12 Te vitna cùyii-o càháⁿ ndìhi-o Yǎ Ndiǒxí cuendá sá ndécú ndìhi-o Xítóhó Jesucrístú, te sàndáá iní-ó-gǎ. 13 Te núu xiǎⁿ càháⁿ-í dóho-ndo

să cuëi duha ndòho-í vitna dico vá ná tũhú iní-ndó cànchicúⁿ nihnu-ndo ìchi Xítóhó Jesucrìstú. Te sá dúhá ndòho-í te cùu-xi sá vãha sá cúu-xi-ndó, chi cuu-ndo ñãyiu cùu cahnu núú Yã Ndiõxí.

Xítóhó Jesucrìstú ío cùu iní ñãhá-gã xii-o

¹⁴ Te sá cuëndá nchaa sá ñĩ sani iní Dútú Ndiõxí quidé-gã xiãⁿ yúhú nguĩñĩ xítì-í núú-gã càháⁿ ndìhi-í-gá, te ñiu-ni-gá cúú Yáá cúú Tátá Xítóhó Jesucrìstú. ¹⁵ Te mee Yã Ndiõxí ní cachí-gá sá ncháá espíritú ndécú àndiu cunduu-xi datná ní cachí méé-gã cunduu-xi. Te ní cachí tucu-gá sá nchóó cùu-o ñãyiu, te cunduu-o dàtná cuiní méé-gã cunduu-o. ¹⁶ Te xicáⁿ táhù-í núú Dútú Ndiõxí sá Espíritú-gá ná cádá nacuáa cuita níhí ndéé-gã-ndó quĩhíⁿ cundecu-ndo ìchi-gá, te ducaⁿ xicáⁿ táhù-í núú-gã cada Espíritú-gá chi ío cãhnu cuu-gá. ¹⁷ Te xicáⁿ táhú tucu-í núú Yã Ndiõxí sá Xítóhó Jesucrìstú ná cundecu ndìhi ñaha-ni-gá xii-ndo chi sãndáá iní-ndó-gã, te ducaⁿ te vá dáñã ndéé-ndó ío cuu iní tnáhá-ndó. ¹⁸ Te xicáⁿ táhú tucu-í núú Yã Ndiõxí cuëndá-ndó ndìhi cuendá dava-gá ñãyiu cùu cuendá-gá, cuëndá sá cútnùnì iní-ndó sã sũúnì cùu iní ñãhá Xítóhó Jesucrìstú xii-o. ¹⁹ Te duha xicáⁿ táhù-í núú Yã Ndiõxí chi cuiní-í sá ncháá-ndó tècú tnùnì-ndó sã ío cùu iní ñãhá Xítóhó Jesucrìstú xii-o cuëi vá ndácú càva-o quini-ó nacuáa cùu iní ñãhá-gã xii-o. Te xicáⁿ táhú tucu-í núú Yã Ndiõxí sá ío na cundecu ndìhi ñaha-gá xii-ndo, te ducaⁿ cànchicúⁿ nihnu-ndo càda-ndo nchaa nacuáa quide mee-gá.

²⁰ Te Yá Ndiõxí ío-gá vài sá ndácú-gã táxi-gã dàcúúxí sã xicáⁿ-ó nũú-gã, te cuëi ndéé nchaa sá ñã túú sàni iní-ó ñhí-ó te tàxi-gá, te ducaⁿ chi mee-gã

ndécú ndìhi ñaha-gá xii-o, te ndàcu-gá quidé-gă nándi sá vâha sá cúú-xí-ó. ²¹ Te vitna nchaa nchoo ñăyiu ndècu ichi Xítóhó Jesucrìstú chí ná càchí-ó sã ïo càhnu cuu Yá Ndiǒxí, te ducaⁿ-ni cãháⁿ-ó sã ïo càhnu cuu-gá ni caa ni quíhíⁿ chi ndècu ndìhi-o Xítóhó Jesucrìstú. Te ducaⁿ na cùnduu.

4

Espíritú Yă Ndiǒxí quidé-xí cùu ìⁿnuu-o ndecu-o

¹ Te yúhú té Păblú yíhí-í vecaá sá cuëndá Xítóhó Jesucrìstú, te cãháⁿ ndàhú-í núú-ndó sã cádá vâha-ndo cùndecu-ndo datná tàú-xi cada cue ñăyiu ní cãháⁿ Yă Ndiǒxí cundecu ndìhi-gá. Te nchòhó tnàhá-ndó cùu-ndo ñăyiu ní cãháⁿ ñáhá Yă Ndiǒxí cundecu ndìhi-gá. ² Te vá cádá càhnu-ndo mee-ndo, cunduu váha iní-ndó, cunduu càhnu iní-ndó, te cuu iní tnáhá-ndó năcuáa ducaⁿ cùndee iní-ndó nūu ná cúú sã cúmăní nūú tnáhá-ndó. ³ Te ïo nducu ndêe-ndo cuu ìⁿnuu-ndo cundecu-ndo, chi Espíritú Yă Ndiǒxí chindee ñaha-xi xii-ndo, te ducaⁿ ïo váha cuu iní-ndó cùndecu-ndo chi cùu ìⁿnuu-ndo. ⁴ Te nchoo ñăyiu ndècu ichi Xítóhó Jesucrìstú ìⁿ-ni cùu-o, te ducaⁿ ìⁿ-ni Espíritú Yă Ndiǒxí ndécú, te ðiu-ni ducaⁿ ìⁿ-ni tnúhu ndee ìní ní ngúndecu ndìhi-o cùtnàhá ní cãháⁿ ñáhá Yă Ndiǒxí xii-o. ⁵ Te ìⁿ-ni Xítóhó Jesucrìstú ndécú tàxi tnuní ñáhá-gă xii-o, te ìⁿ-ni cùu-o sandáá ìní-ó tnúhu-gá, te ìⁿ-ni ñă sandute-o. ⁶ Te ìⁿ-ni Dütú Ndiǒxí cúú Yàá cúú Tătá-ó nchàa-o, te ðiu-gá cúnūu-gá yíndàha ñaha-gá xii-o nchàa-o. Te Yá Ndiǒxí dácàháⁿ-gá ìní-ó quide-o chiuⁿ-gá, te ducaⁿ ndècu ndìhi ñaha-gá xii-o nchàa-o.

7 Te nchoo ndì dííⁿ ndì dííⁿ chìndee ñaha Yá Ndiõxí xii-o quède-o nacuáa ndùu chiuⁿ ní cachí Xítóhó Jesucrístú cada-o. 8 Te quèe ndáá-xi nàcuáa càháⁿ-xi núú tütú Yá Ndiõxí núú càchí-xi:

Xítóhó Jesucrístú cuándaa-gá andiu te ío cùnuu-gá, chi nchaa cue espíritú cúú ùhú iní ñáhá xii-gá ñá túú ní ndàcu-xi naá ndihí ñaha-xi xii-gá, te mee-gá ní cachí-gá nàcuáa ndùu chiuⁿ nduu táhú ñⁿ ñⁿ ñáyiu cadá-yu.

Duha càchí-xi núú tütú-gá.

9 Te sá dúcáⁿ càháⁿ-xi sá cuándaa-gá andiu xiáⁿ cútnùní iní-ó sã ñí cuuⁿ-gá ñuyíú-a. 10 Te Xítóhó Jesucrístú ní cuuⁿ-gá ñuyíú-a, te diu-ni-gá cuándaa-gá andiu cuendá ío cunuu-gá taxi tñùní-gá nchaandi túhú sá ío. 11 Te ní dácãhñu-gá cue tée xinu cuechi núú-gã ñⁿ ñⁿ núú chiuⁿ cada-güedé. Te ní cachí-gá sá dàva-güedé càháⁿ-güedé tñuhu-gá, te dava-güedé ní cachí-gá sá càháⁿ-güedé nàcuáa dàcahu iní ñáhá Yá Ndiõxí xii-güedé. Te dava-güedé ní cachí-gá sá cúú-güedé cue tée datècú tñuhu cue ñáyiu nàcuáa cadá-yu naníhí tàhú-yu. Te dava-güedé ní cachí-gá sá cúú-güedé cue tée quindaha ñaha xii ñáyiu dacuàha ñaha-güedé xií-yu tñuhu-gá. 12 Te ducaⁿ ñí cachí-gá cada cue tée-áⁿ cuendá canu ichi-güedé cue ñáyiu cùu cuendá Yá Ndiõxí cuendá ducaⁿ ñáyiu-áⁿ ñihí-yu nàcuáa cadá-yu chiuⁿ-gá, te ducaⁿ cuíta níhí ndéé-gã-yu cundecú-yu ichi Xítóhó Jesucrístú. 13 Te ducaⁿ ñí cachí Xítóhó Jesucrístú cunduu ndéé sáá nduu cùu ñⁿnuu-o quindáá iní-ó tñuhu-gá, te ducaⁿ cùu ñⁿnuu-o tecú tñùní-ó nàcuáa ndùu cuendá-gá chi diu-gá cúú-gã Déhe Yá Ndiõxí, te cuu-o ñáyiu ío quède ndáá dàtná quidé mèe Xítóhó Jesucrístú. Te ducaⁿ te ñá túú tñahí-gá ná cùmání-ó

núú Yă Ndiöxí. ¹⁴ Te ducaⁿ te vá cúú-gă-ó dàtná cue landú vátá cútnùní váha-gá iní-xí, te ni vă cádá-gă-ó dàtná quidé ndùte lamár, chi ndute-áⁿ òré quéné tächí te cuáháⁿ-xi duha cuáháⁿ-xi dàcáⁿ, te ducaⁿ chi vá quìndáá-gá iní-ó tnùhu càháⁿ nchaa ñáyiú dándahú ñáhá xì-o, chi ñáyiú-áⁿ ïo váha xító-yu nàcuáa dándahú ñáhă-yu xii-o chi càchí-yu sá càháⁿ-yu tnúhu Yá Ndiöxí dico ñá ndàá. ¹⁵ Te nchoo ïo cuu iní tnáhá-ó, te vá dándahú tnáhá-ó, chi cáháⁿ-ó mèe-ni sá ndàá. Te xìni ñuhu-xi sá ìⁿ nduu ìⁿ nduu cuita cada ndáá-gá-ó quìhíⁿ dàtná quidé ndáá méé-gă, te ðiu-ni-gá cúú-gă Yaá cúnùu cuu díhna tàxi tnuní ñáhá-gă xii-o. ¹⁶ Te ðiu-ni Xítohó Jesucrìstú quidé ñàha-gá xii nchaa nchoo ñáyiú ndècu ichi-gá dàtná yìquì cùñú méé-gă, chi ìⁿ yìquì cùñú ïo váha ní quée tnàha ìⁿ ìⁿ xichi, te ducaⁿ yìhì túchi yìquì cùñú-ăⁿ yótnì-xi nchaa nacuáa ní quée tnàha. Te ducaⁿ sàtnahá-xi cùu nchoo chi ìⁿ-ni cùu-o ndecu-o ichi Xítohó Jesucrìstú táxi tnùnì ñáhá-gă xii-o. Te núu nchoo quide-o nchaa nacuáa tàú-xi cunduu te cùu iní tnáhá-ó, te ducaⁿ ta nìhì ndéé-gă-ó cuáháⁿ ndécú-ó ìchi-gá.

Vá cádá-gă-ó dàtná ní xóo cada-o cùtnàhá ní xìndecu-o ìchi cuehé ichi duha

¹⁷ Te vitna yúhú càháⁿ-í dóho-ndo quide-í núú Xítohó Jesucrìstú sá vă cùndècu-gá-ndó dàtná xìndecu ñáyiú ñá túú sàndáá iní ñáhá xì Yá Ndiöxí, chi nchaa ñáyiú-áⁿ ñà túú vèdana nàndìhì nchaa sá sání iní-yu. ¹⁸ Te ni ñà túú vèdana cùtnunì iní-yu nàcuáa ndùu tnúhu ndáá tnúhu Yá Ndiöxí. Te ñáyiú-áⁿ ñà túú ndùu táhŭ-yu cundecú-yu nàcuáa cuinì Yă Ndiöxí, chi ñá túú vèdana tècú

tnùnì-yu te ducaⁿ chi ío sàà iní-yu. ¹⁹ Te ñá túú tnàhí-gá ná sání iní-yu ndècú-yu ichi cuèhé ichi duha, te ío cùdíí iní-yu ndècú-yu ichi díí iní, te ñá díú-ní xǎⁿ chi nándi-gá nchaa sá cuèhé sá dúhá quidé-yu ndècú-yu. ²⁰ Dico tnúhu Xítóhó Jesucristú sá ñí sándáá iní-ndó chi ñá túú dùcaⁿ sanu ichi ñaha-xi xii-ndo cada-ndo. ²¹ Te nchòhó ní cutnùnì iní-ndó nàcuáa ndùu cuendá Xítóhó Jesucristú, te dàcuaha-ndo tnúhu ndáá ñi-ni tnúhu-gá nàcuáa ndècu-ndo ichi-gá. ²² Te vitna vá cání-gǎ iní-ndó càda-ndo datná ní xóo cada-ndo cǔtnàhá ní xíndecu-ndo ìchi cuehé ichi duha, chi núu nchaa-ni sá cuèhé sá dúhá-ǎⁿ ná cùhuⁿ-ni iní-ndó càda-ndo, te uuⁿ-gá uuⁿ-gá cuita dacuíta nihnu ñaha-xi xii-ndo quíhíⁿ, chi núu nchaa-ni sá cuèhé sá dúhá-ǎⁿ ná cùhuⁿ-ni iní-ndó te dàticá nuu ñaha-xi xii-ndo. ²³ Te nchòhó, xìni ñuhu-xi sá vǎ dúcáⁿ-gǎ caní iní-ndó càda-ndo te tàú-ndó ndùu-ndo datná ñⁿ ñáyiú ní cacu túu saa. ²⁴ Te nduu iní-ndó dàtná cuìní méé Yǎ Ndiǒxí cunduu, chi nduu-xi nàcuáa càa iní méé-gǎ, te ducaⁿ te cuu-ndo ñǎyiú ío váha cada ndáá, te cuu ndisa-ndo ñǎyiú ñá túú tnàhí ná cumání cundecu núú-gǎ.

²⁵ Te cuendá xǎⁿ núu càháⁿ-í dóho-ndo sǎ nchòhó vá dàcuàndehnde-gá-ndó dàtná ní xóo cada-ndo, te mee-nǎ sá ndáá cáháⁿ ndihí tnàha-ndo, chi ñⁿ-ni cùu-o ndecu-o ichi Xítóhó Jesucristú.

²⁶ Te núu cùdééⁿ-ndó te cada cuendá-ndó sǎ vǎ cádá-ndó ñⁿ cuéchi sá dúcáⁿ cùdééⁿ-ndó, te vá dúcáⁿ-ní cùhuⁿ iní-ndó tnúhu sàtú iní-áⁿ. ²⁷ Te vá dáñá-ndó mèe-ndo dandahú ñáhá sàcuíhná xii-ndo.

²⁸ Te núu dava-ndo cùu-ndo ñadúhú te vá dúcáⁿ-gǎ cada-ndo, chi nducu-nǎ-ndó ñⁿ

chiuⁿ váha cada-ndo nàcuáa ducaⁿ ñhí-ndó sǎ chindèe-ndo cue ñáyiú ndàhú ñáyiú ñá túú ñá ndécú ndìhi.

²⁹ Te vá càháⁿ-gá-ndó ñi ñⁿ tnúhu cuèhé, chi mee-ñá tnúhu vii tnúhu váha càháⁿ-ndó nàcuáa ducaⁿ ngũnu ichi cue ñáyiú ndèdóho ñaha xii-ndo, te núu ducaⁿ na càda-ndo te cuu-xi sá vǎha sá cúu-xí ñáyiú ducaⁿ ndèdóho ñaha xii-ndo-áⁿ.

³⁰ Te vá cáda-gǎ-ndó ñi ñⁿ sá ñá túú tàú-ndó càda-ndo cuendá sá vǎ dándìhú-ndó ñi Espiritú Yǎ Ndiǒxí, chi ñi Espiritú-gá ndécú ndìhi-ndo, te xǎáⁿ cútnùní ñi-ndó sǎ sàá nduu nàcuaca ñaha-gá xii-ndo cùndecu-ndo ndìhi-gá ñi caa ñi quíhíⁿ.

³¹ Te vá dásátú-gá-ndó ñi tnàha ñáyiú-ndo, te ñi vǎ cúhúⁿ ñi-ndó tnúhu sàtú ñi, te ñi vǎ cúdèéⁿ-gǎ-ndó, te cuèi núú chítú núú tàcá vǎ càháⁿ cana-ndo cǔcuèhé-ndó tnàha ñáyiú-ndo, te ñi vǎ cuátnùhu-ndo tnàha ñáyiú-ndo, te ñi vǎ cáni cuèhé cani duha ñi-ndó cuendá tnàha ñáyiú-ndo.

³² Te cundàhú ñi tnáhá-ndó, te cada tnàha-ndo sá vǎha, te cada càhnu ñi tnáhá-ndó núu ná cúú sǎ cúmǎní núú tnáhá-ndó dàtná ñi quide Yǎ Ndiǒxí ñi quide càhnu ñi-gá nchaa yíca cuèchi-ndo sǎ cuendá Xítóhó Jesucrístú.

5

Nàcuáa tàú-xi cundecu nchaa ñáyiú cùu déhe Yǎ Ndiǒxí

¹ Te nchòhó cúú-ndó ñáyiú ío cùu ñi ñáhá Yǎ Ndiǒxí, te ñi déhe-gá cúú-ndó núu xǎáⁿ xíní ñùhu-xi canchicúⁿ ñi-ndo càda-ndo datná quidé mèe-gá. ² Te ío cuu ñi tnáhá-ndó cùndecu-ndo datná cúú ñi ñáhá Xítóhó Jesucrístú

xii-ndo, chi ñiu-gá ní cachí-gá sá cùú-gá cuendá nchaa cuéchi-o te ní xíhí-gá, te sá dúcáⁿ ñí xíhí-gá te ní cuu-gá òàtná ñⁿ táhú sá cùú-xí Yă Ndiöxí, te ío váha ní cuu iní Yă Ndiöxí sá dúcáⁿ ñí quide-gá.

³ Te sá cuendá sá nchòhó cùú-ndó ñăyiu cùu cuendá Yă Ndiöxí ñúu xíáⁿ nchaa nchòhó cue téé vá càháⁿ ndihí-ndo ñăyiu ñihí te núu ñá díú ñàdihí-ndó cùú-yu, te ducaⁿ-ni nchàa nchòhó cue ñăyiu ñihí tucu vá càháⁿ ndihí-ndo cuè téé te núu ñá díú yì-ndo cuu-güedé, te ni vǎ cání tnàhí iní-ndó cùndecu-ndo ichi ñí iní, te ni vǎ xíhó-ndó ñí ñⁿ sá ndécú ndihí tnaha ñăyiu-ndo, te ni ñⁿ nchaa xíáⁿ vá cání iní-ndó càda-ndo, te ni vǎ cǎcú nèhe-ndo. ⁴ Te ni vǎ càháⁿ-ndó ñⁿ tnúhu sá ni vǎ cùú cùndedóho ñăyiu, te ni vǎ càháⁿ-ndó ñⁿ tnúhu cùtexínu, te ni òava-gá nchaa tnúhu sá ñà túú vǎdana nàndíhi vá càháⁿ-ndó, chi nchaa tnúhu-áⁿ ñà túú tàú-xi càháⁿ-ndó, te xini ñuhu-xi sá váha-gá sá ndàcáⁿ táhú-ndó ñúú Yă Ndiöxí cuendá nchaa sá váha quide-gá. ⁵ Te nchòhó sa xini ndáá-ndó sá ncháá cuè téé càháⁿ ndihí ñăyiu ñihí te ñá díú ñàdihí-güedé cùú-yu, ndihí cue ñăyiu ñihí càháⁿ ndihí cue téé te ñá díú yì-yu cùu-güedé, nchaa ñăyiu-áⁿ vǎ ndúú tǎhǔ-yu cundecú-yu núú ndécú Yă Ndiöxí ndihí Xítóhó Jesucristú táxí tnùnigá. Te ni cuè ñăyiu xíndecu ichi ñí iní, te ni cuè ñăyiu xího nchaa sá ndécú ndihí tnaha ñăyiu-xi vá ndúú tǎhǔ-yu cundecú-yu ndihí-gá núú ndécú-gǎ táxí tnùnigá. Te tnúhu sá càchí-ó xího-o nchaa sá ndécú ndihí tnaha ñăyiu-o, ñⁿ-ni cùu-xi ndihí tnúhu sá càchí ñăyiu quide cahnú-yu nchaa sá càchí-yu cùu ndióxí te ñá

ndàá sá ndiõxí cúú-xí. ⁶ Te vá quìndáá iní-ndó ñì ìⁿ tnúhu sá ñà túú nàndíhi càháⁿ ñáyiú, chi ñáyiú-áⁿ ïo dandòho ñaha Yá Ndiõxí xií-yu cuèndá nchaa sá cuèhé sá dúhá quidé-yu chi ñá túú sàndáá iní ñáhã-yu xii-gá. ⁷ Núu xiãⁿ càháⁿ-í dóho-ndo sã vã ñihí tnáhá-ndó ndìhi cue ñáyiú-áⁿ.

⁸ Te nchòhó ní cuu-ndo dàtná cue ñáyiú ní xíndecu núú néé chi ní xíndecu-ndo ìchi cuehé ichi duha, dico vitna ní ngúndecu-ndo ìchi Xítohó Jesucristú, te ñá túú-gã ndécú-ndó núú néé dàtná ní xíndecu-ndo ñì cùu. Te vitna cada-ndo nchàa nacuaá tàú-xi cunduu chi ndècu-ndo ichi-gá. ⁹ Te sá cuèndá sá ndécú-ndó ìchi-gá núu xiãⁿ cúú-ndó ñáyiú váha, te quide ndáá-ndó ndècu-ndo, te ñá túú dàcuandehnde-ndo chi càháⁿ-ndó mèe-ni sá ndáá. ¹⁰ Te ío váha cada cuèndá-ndó nchàa sá cúú vãha iní Xítohó Jesucristú, te xiãⁿ cada-ndo. ¹¹ Te vá cãncíⁿ níhu-ndo tnáhá-ndó càda-ndo datná quidé cuè ñáyiú ndècu ichi cuehé ichi duha, chi nchòhó tàú-ndó càháⁿ-ndó dõho nchaa ñáyiú ducaⁿ ndècu ichi cuehé ichi duha-áⁿ cuèndá nchaa sá quidé-yu. ¹² Te cucahaⁿ núú-ndó vã càháⁿ-ndó cuèndá ñì ìⁿ sá cuèhé sá dúhá quide dayuhu nchaa ñáyiú-áⁿ. ¹³ Dico òré dándixi túú tnúhu Yá Ndiõxí iní-yu nàcuáa quidé-yu te cùtnuní iní-yu sá ñã túú quide váha-yu, te ducaⁿ ndìxi cuéchi iní-yu cuèndá nchaa sá cuèhé sá dúhá quidé-yu. ¹⁴ Te núú tütú Yá Ndiõxí càchí-xi:

Nchòhó cúú-ndó dàtná ñáyiú xidí, te vitna ndiquíú ìní-ndó,
te cùu tucu-ndo datná ñáyiú ní xíhí, te vitna ndoto-ndo,

te Xítohó Jesucristú chindee ñàha-gá xii-ndo
nàcuáa vá cùndècu-gá-ndó ìchi cuehé ichi
duha.

Duha càháⁿ-xi núú tütú-gá.

¹⁵ Te ío váha cada cuèndá-ndó nàcuáa cada-ndo
cùndècu-ndo, te vá cáda-ndó dàtná xíquide cue
ñáyiú ñá túú tècú tnùnì, chi cada-ndo dàtná xíquide
ñáyiú ío váha sàá díquí-xi. ¹⁶ Te ìⁿ nduu ìⁿ
nduu cani iní-ndó càda-ndo nchaa nacúaa tàú-xi
cunduu, chi vitna ío cùnuu nchaa sá cuèhé sá
dúhá. ¹⁷ Te cuu-ndo ñáyiú tècú tnùnì cuèndá
ducaⁿ cùtnunì iní-ndó nàcuáa cuìnì Yá Ndiöxí
cada-ndo, te vá cáda-ndó dàtná xíquide cue ñáyiú
ñá túú tnáhí cùtnunì iní-xi nàcuáa cuìnì Yá Ndiöxí
cadá-yu. ¹⁸ Te vá cúú-ndó ñáyiú quihu chi núú
ducaⁿ na càda-ndo te dàcuíta nihnu-ndo mèe-ndo,
te dañà-ndo mèe-ndo sá Espíritú Yá Ndiöxí ná tàxi
tnunì ñáhá-xí xii-ndo. ¹⁹ Te cáháⁿ-ndó nàcuáa-ni
cuáháⁿ ndudú sá ñí xóo cata nchaa cue ñáyiú ndéé
sanaha ñí xóo chiñuhú-yu Yá Ndiöxí. Te cáháⁿ-ndó
nàcuáa cuáháⁿ ndudú sá chíñuhu-ndo Yá Ndiöxí,
te cata-ndo. Te cuèi nchaa dava-gá ndudú diu-ni
ducaⁿ cãháⁿ-ndó te cata-ndo. Te ñí yùhu ñí iní-ndó
càta-ndo nchaa ndudú-áⁿ chiñuhu-ndo Yá Ndiöxí.
²⁰ Te vá dǎná ndéé-ndó ndàcáⁿ táhú-ndó núú
Tátá-ó Dütú Ndiöxí cuèi ndècu váha-ndo àdi ñá
túú ndècu váha-ndo. Te ducaⁿ càda-ndo chi ndècu
ndìhi-ndo Xítohó Jesucristú.

*Tàú-xi sá quèndáa iní tnáhá cue ñáyiú ndècu ichi
Xítohó Jesucristú*

²¹ Te nchòhó ñáyiú ndècu ichi Xítohó Jesucristú
tàú-xi sá quèndáa iní tnáhá-ndó, te ducaⁿ càda-ndo
chi nèhe-ndo sá yíñuhu núú Yá Ndiöxí.

22 Te nchaa nchòhó ñáyiú dîhî ndécú yî-xi, xîni ñuhu-xi sá quìndáá iní-ndó yî-ndo datná sàndáá iní-ndó Xítóhó Jesucristú. 23 Chi yî-ndo tàxi tnuní ñáhá-güedě xii-ndo dàtná quidé Xítóhó Jesucristú táxi tnùnî ñáhá-gă xii nchoo cuè ñáyiú ndècu ichi-gá. Te ñiu-gá cúú-gă Yaá ní dácăcu nihnu ñaha xî-o núú ùhú núú ndàhú, te cùu-o datná yiqui cùñú-gá. 24 Te dàtná quidé nchòo ñáyiú ndècu ichi Xítóhó Jesucristú sàndáá iní-ó tnî-o nchaa tnúhu càháⁿ-gá, ducaⁿ tàú-xi cada nchaa nchòhó ñáyiú dîhî quìndáá iní-ndó tnî-ndo nchaa tnúhu càháⁿ yî-ndo.

25 Te tnàhá nchaa nchòhó cue téé tucu tàú-xi sá ío cuu iní-ndó ñàdîhî-ndó dàtná quidé Xítóhó Jesucristú cúú iní ñáhá-gă xii nchaa nchoo ñăyiú ndècu ichi-gá, chi mee-gă ní xîhî-gá sá cuendá-ó să cúú iní ñáhá-gă xii-o. 26 Te ducaⁿ ñî quide-gá cuendá sá ncháá ñăyiú vitna ngündecu ichi-gá cuu yîñùhú-yu núú Yă Ndiöxí, te ducaⁿ ndàda ndoo ndada nine-gá iní-yu sá cuendá sá quìndáá iní-yu tnúhu Yă Ndiöxí, te cuanduté-yu. 27 Te ducaⁿ ñî quide-gá cuendá sá ncháá ñăyiú na ngündecu ichi-gá ío váha cundecú-yu núú-gă, te ducaⁿ vă cündècu-gá ni ìⁿ cuéchi-yu núú-gă, te ni ìⁿ-gá sá ñà túú-gă ná cumánî-yu núú-gă chi ío cundecu yîñùhú-yu. 28 Te sá dúcáⁿ quide Xítóhó Jesucristú sá cúú-xí cuè ñáyiú ndècu ichi-gá, xîáⁿ tàú-xi sá nchòhó cue téé xîndecu ñadîhî-xi cuu iní-ndó ñàdîhî-ndó, te coto-ndô-yu dàtná xító-ndó yiqui cùnú méé-ndó, te cada iní-ndó să ncháá cuè téé ío cùu iní ñadîhî-xi cùu iní-güedé méé-güedé chi

ìⁿ-nǎ cúŭ-yu. ²⁹ Te nchoo sà naha-o sá nì ìⁿ ñáiyu ñá túú dàquee tíhŭ-yu yíqui cùñú-yu, chi da uuⁿ-gá chíndèé-yu te xító-yu. Te ñiu-ni ducaⁿ quide Xítóhó Jesucristú ndihí nchaa ñáiyu ndècu ichi-gá, ³⁰ chi cùu-o datná yíqui cùñú méé-gǎ, te ducaⁿ chi ìⁿ-ni cùu-o ndihí-gá. ³¹ Te tnúhu Yá Ndiöxí cächí-xi: “Sá cuëndá xǎⁿ nŭu nchaa cue téé na nihí ñadihí-xi te ñiⁿ-ná cada-güedé tǎtá-güedé ndihí nǎná-güedé, te ñadihí-nǎ-güedé cuu cuu ndihí-güedé, te ducaⁿ ìⁿ-ná cuu-güedé ndihí-yu”, duha cächí-xi. ³² Te tnúhu-a cùu-xi ìⁿ tnúhu càhnu vihi, te ducaⁿ sǎ tnàhá-xi cùu Xítóhó Jesucristú ndihí cue ñáiyu ndècu ichi-gá. ³³ Te cǎháⁿ-ni tucu-í dóho nchaa nchòhó cue téé xǐndecu ñadihí-xi sá ïo cuu iní-ndó ñadihí-ndó te coto-ndó-yu dàtná xító-ndó mèe-ndo, te ducaⁿ-ni nchàa nchohó ñáiyu ñihí tucu canehe-ndo sǎ yíñùhu núú yi-ndo.

6

¹ Te nchaa nchòhó cue landú, quíndáá iní-ndó tǎtá-ndó ndihí náná-ndó chi ducaⁿ cuení Yá Ndiöxí cunduu, te ñiu ducaⁿ tnàhí tàú-xi cada-ndo. ² Te Yá Ndiöxí ní cachí-gá sá cǎnèhe-ndo sá yíñùhu núú tǎtá-ndó ndihí núú nǎná-ndó. Te tnúhu-án cúú-xí tnúhu cùnuu ní cǎháⁿ-gá cada cue ñáiyu cuëndá cada váha ñaha-gǎ xií-yu. ³ Te ní cachí-gá sá nŭu ducaⁿ na càda-ndo te ío váha cundecu-ndo, te ducaⁿ ïo naha cùdí-ndo cùndecu-ndo ñuyíú-a.

⁴ Te nchaa nchòhó cue téé cùu tǎtá, vá dásátú-ndó iní cue déhe-ndo chi canu ichi-ndo-güèxi nacuáa tàú-xi cunduu, te

dacuàha-ndo-güexi nchaa tnúhu váha nàcuáa cuìní Yă Ndiöxí cunduu.

⁵ Te nchaa nchòhó cue ñáyiú xìnu cuechi, quindáá iní-ndó cuè ñáyiú dii chiuⁿ-xi quide-ndo, te canehe-ndo sã yíñùhu núŷ-yu, te ío váha cuu iní-ndó càda-ndo chiúⁿ-yu, te ducaⁿ nì yuhu nì iní-ndó càda-ndo. Te cada iní-ndó sã dàtná tnúhu sá chíúⁿ Xìtohó Jesucristú quidé-ndó. ⁶ Te dava ñáyiú xìnu cuechi, mee-ni òré ndéhé ñáyiú dii chiuⁿ-xi quidé-yu ío ndùcu ndeé-yu quide chiuⁿ váha-yu cuendá cuìní-yu cudíú-yu. Dico nchòhó vá dúcáⁿ càda-ndo, chí cuèi ndècu ñáyiú dii chiuⁿ-xi quide-ndo àdi ñá túŷ-yu dico cada chiuⁿ váha-ni-ndo, te cada iní-ndó sã dàtná tnúhu sá chíúⁿ Xìtohó Jesucristú quidé-ndó, te cada-ndo nì yuhu nì iní-ndó nàcuáa cuìní Yă Ndiöxí cunduu.

⁷ Te ío váha cuu iní-ndó càda-ndo chiuⁿ-án, chí cada iní-ndó sã dàtná tnúhu sá chíúⁿ Xìtohó Jesucristú quidé-ndó te ñá díú chiuⁿ cue ñáyiú ñuyíú-a. ⁸ Te nchòhó sa cùnuni iní-ndó sã nàcuáa ndùu chiuⁿ váha ní quide-ndo ìⁿ ìⁿ-ndo, te ducaⁿ cunduu sá táxí Xìtohó Jesucristú nduu táhú-ndó cuèi cùu-ndo ñáyiú dàñá queé núú chíúⁿ pàtróóⁿ-xi àdi cuu-ndo ñáyiú ñá túú tnàhí dàñá quee núú chíúⁿ pàtróóⁿ-xi.

⁹ Te nchaa nchòhó ñáyiú xíndecu ndìhi ñáyiú xìnu cuechi, tnàhá-ndó tàú-ndó càda váha-ndo sã cúú-xí cuè ñáyiú xìnu cuechi núú-ndó, te vá cùndùu nínu iní-ndó núŷ-yu, te chí cuàha cuendá sá díú-ní Xìtohó Jesucristú Yaá ndécú àndu taxi tnuní ñáhá-gă xii-ndo ndìhí-yu, te sá cúú-xí mèe-gá chí ìⁿ-ni cùu-ndo núú-gă, te ìⁿ-ni càda ñaha-gă xii-ndo.

Yá Ndiöxí chíndè-gá cue ñáyiú ndècu ichi-gá

cuendá sá vǎ ndácú sàcuíhná nàá ndihí ñaha-xi xì-yu

10 Te vitna nchaa nchòhó ñáyiú ndècu ndihí-í ichi Xítohó Jesucrìstú càchí tnúhu-í xii-ndo sǎ ìo nducú-ndo nàcuáa cada-ndo ñhí ndéé-ndó cùu ìn nuu-ndo ndihí Xítohó Jesucrìstú, chi mee-gǎ ìo càhnu cuu-gǎ, te chindee ñaha-gǎ xii-ndo. 11 Te ñu-ñi nchaa sá ñi nduu táhú-ndó núú Yǎ Ndiòxí ñu-ñi nchaa xiǎⁿ cuhuⁿ iní-ndó, chi xiǎⁿ chindee ñaha-xi xii-ndo ñhí ndéé-ndó cùndecu-ndo cuendá sá vǎ dándàhú ñáhá sàcuíhná xii-ndo. 12 Chi nchoo ñà díú cuè ñáyiú ñuyíú-a nàá ndihí-o, chi ndihí cue espíritú cùndihí yucu ñávǎha, te ñu-ñi nchaa espíritú-áⁿ cùnùu-xi cuéi núú ñnu quide-xi nchaa sá cuèhé sá dúhá, te ñu-ñi-xi cùnùu-xi ñuyíú-a sànu ichi-xi cue ñáyiú quidé-yu nchaa sá cuèhé sá dúhá. 13 Te ìo cuhuⁿ iní-ndó nchaa sá ñi nduu táhú-ndó núú Yǎ Ndiòxí cuendá ducaⁿ ñhí ndéé-ndó cùndecu-ndo, te vǎ ndácú yùcu ñávǎha ná cada ñaha-xi xì-ndo oré cuíni-xi coto ndeé ñáhá-xí. Te sátá ná dàquee tíhú-ndó yùcu ñávǎha te ñhí-ñi cunduu-ndo cùndecu-ndo ichi Yǎ Ndiòxí. 14 Te ducaⁿ cùndecu-ñi-ndo ichi Yǎ Ndiòxí cada-ndo dàtná xǐquide cue sandàdú, chi cue téé-áⁿ ìo ñhí xǐndáa-güedé. Te cáháⁿ-ndó mèe-ñi tnúhu ndáá tnúhu Yǎ Ndiòxí, te cuu-ndo dàtná cue sandàdú cue téé ndàda tii xití-xi òré quíhíⁿ-güedé nàá-güedé. Te ducaⁿ sǎtnahá-xi cuu-ndo te núu na càháⁿ-ndó mèe-ñi tnúhu ndáá tnúhu Yǎ Ndiòxí. Te cada ndáá-ndó cùndecu-ndo ichi-gǎ, te cuu-ndo dàtná cue sandàdú cue téé xǐxǐhnu sá yídǎhu ñaha xì-güedé òré nàá-güedé cuendá sá vǎ ñicuehé-güedé. Te ducaⁿ sǎtnahá-xi cuu-ndo te núu na càda ndáá-ndó cùndecu-ndo

ichi-gá. ¹⁵ Te cundecu túha-ndo cǎháⁿ-ndó tnǎhu Xítóhó Jesucristú, tnúhu sá cǎháⁿ nàcuáa cuu váha iní ñáyi cuundecú-yu, te cuu-ndo dàtná cue sandàdú cue téé ndíhu zapàtú-xi quíhíⁿ-güedé nàá-güedé. Te ducaⁿ sǎtnahá-xi cuu-ndo te núu na cùndecu túha-ndo cǎháⁿ-ndó tnǎhu Xítóhó Jesucristú núu ñáyi. ¹⁶ Te cǎchí tnúhu tucu-í xii-ndo sǎ ïo quindáa iní-ndó Yǎ Ndiǒxí cuendá sá vǎ ndácú sàcuíhná nǎ cada ñaha-xi xii-ndo, te ducaⁿ te cuu-ndo dàtná cue sandàdú cue téé xínehe vítú chínèe-güedé sáquídáhu ñaha-xi xii-güedé cuendá sá vǎ cuicúⁿ-güedé sá nchicúⁿ ñuhú téé ñaha cue téé nàá ndihi-güedé. Te ducaⁿ sǎtnahá-xi cuu-ndo te núu na quindáa iní-ndó Yǎ Ndiǒxí. ¹⁷ Te ío cuhuⁿ iní-ndó sǎ ñí naníhí tǎhú-ndó, te cuu-ndo dàtná cue sandàdú cue téé ñuhú mbelú cáxíⁿ. Te ducaⁿ sǎtnahá-xi cuu-ndo te núu na cùhuⁿ iní-ndó sǎ ñí naníhí tǎhú-ndó. Te ío cuhuⁿ iní-ndó tnǎhu Yǎ Ndiǒxí, chí tnúhu-áⁿ ñí taxi Espiritú-gá ndécú ndihi-ndo chindee ñaha-xi xii-ndo, te cuu-ndo dàtná cue sandàdú cue téé xínehe machítí cuáháⁿ-güedé nàá-güedé. Te ducaⁿ sǎtnahá-xi cuu-ndo te núu na cùhuⁿ iní-ndó tnǎhu Yǎ Ndiǒxí. ¹⁸ Te vǎ dáñá ndéé-ndó cǎháⁿ ndihi-ndo Yǎ Ndiǒxí nàcuáa chindee ñaha Espiritú-gá xii-ndo, te cácáⁿ tǎhú-ndó núú-gǎ núu ná cuiní-ndó, te ío cundecu túha-ndo cǎháⁿ ndihi-ndo-gǎ, te vǎ nátùhú iní-ndó cǎcáⁿ tǎhú-ndó núú-gǎ cuendá nchaa dava-gá cue ñáyi cùu cuendá-gá. ¹⁹ Te tnàhá cuendá-í cácáⁿ tǎhú-ndó núú Yǎ Ndiǒxí cuendá sá ná chindee ñaha-gá xii-í níhi-í tnúhu cǎháⁿ-í órè cǎháⁿ-í tnúhu-gá, te ducaⁿ vǎ yùhú-í cǎháⁿ-í nàcuáa ndùu tnúhu sá cǎháⁿ nàcuáa naníhí tǎhú-ó núú ñáyi tnúhu sá vǎtá cùndèdóho-gá-yu.

²⁰ Te Yá Ndiöxí ní cachí-gá sá yǔhú cuu-í ìíⁿ té cada-í núú-gă cáháⁿ-í tnúhu-gá núú ñăyiu, te ðiu cuendá tnúhu-áⁿ yíhì-í vecaá vitna. Te ío cácaⁿ táhú-ndó núú Yă Ndiöxí cuendá-í cuendá sá yǔhú cuyi-í ñi yùhu ñi iní-í cáháⁿ-í tnúhu-gá núú ñăyiu nàcuáa tàú-xi cunduu.

Tnúhu ndéé núú ñi ndihí-ná

²¹ Te té Tìquicú téé ío cùu iní-í ndécú ndihí-o ichi Xítóhó Jesucristú cúú-dě ìíⁿ téé ío váha quide ndáá xínú cuèchi-dé núú Xítóhó Jesucristú, téé-áⁿ cachí tnúhu-dé xii-ndo nàcuáa cùu ndecu-í ndihí nchaa nàcuáa quide-í cuendá ducaⁿ cùtnuní iní-ndó. ²² Te cuendá xǎⁿ núu cuìní-í tendaha-í-dé quixi-dé núú ndécú-ndó cuendá cachí tnúhu-dé xii-ndo nchaa nacuáa cùu ndecu-ndí iha, te ducaⁿ tàxi-gá-dé tnúhu ndee ìní cundecu ndihí-ndo.

²³ Te xìcáⁿ táhù-í núú Tătá-ó Dǔtú Ndiöxí ndihí núú Xítóhó Jesucristú sá ncháá nchòhó ñăyiu ndècu ndihí-í ichi-gá sá ðiu-gá ná cádá te ío váha cuu iní-ndó cùndecu-ndo, te ducaⁿ ìo cuu iní tnáhá-ndó, te ío quindáá iní-ndó-gă. ²⁴ Te nchòhó ío cùu iní-ndó Xítóhó Jesucristú, te ñá túú dàña ndéé-ndó cùu iní-ndó-gă. Te mee Yă Ndiöxí ío na chindee chitúu ñaha-gă xii-ndo. Te ducaⁿ na cùnduu. Te ío chí cádá ndèe iní-nă vitna.

Tnúhu ní cáháⁿ yă ndiöxí xito cùu uú
New Testament in Mixtec, Peñoles (MX:mil:Mixtec,
Peñoles)

copyright © 2002 Wycliffe Bible Translators, Inc.

Language: Mixtec, Peñoles

Translation by: Wycliffe Bible Translators, Inc.

Mixteco, Peñoles [mil], Mexico

Copyright Information

© 2002, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Peñoles

© 2002, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 21 Feb 2024 from source files
dated 29 Jan 2022

872f7754-0986-5ecd-a059-925a708a6939